

Коронавирусын эсрэг вакциныг хэрэглэх заавар (Нэмэлт тунд (2023 оны хавраас эхлэн хийх)) хамрагдахад

Коронавирусын эсрэг вакцины тухай

Энэхүү вакцин нь үндэсний болон орон нутгийн засаг захиргааны коронавирусын (SARS-CoV-2) эсрэг вакцинжуулалтын хөтөлбөрийн нэг хэсэг юм. Энэхүү вакцинжуулалтыг Засгийн газраас санхүүжүүлж байгаа бөгөөд хүссэн хүн бүр үнэ төлбөргүй хамрагдах боломжтой.

Вакцины үр нөлөө, ашиглах арга

Энэхүү вакцин нь “Pfizer” компанийн омикроны эсрэг 2 валент вакцин (өмнөх вариант (анхдагч вариант) болон омикрон вариантын BA.1 эсвэл BA.4-5) юм. Коронавирусын халдварт өвчний хүндрэлээс урьдчилан сэргийлэх, халдвараас урьдчилан сэргийлэх, өвчлөлөөс урьдчилан сэргийлэх зорилгоор хэрэглэнэ.

BA.1-ийн эсрэг 2 валент вакцин нь 55-с дээш насныханд хийсэн клиник туршилтаар, хийлгэснээс хойш 1 сарын дараах саармагжуулах эсрэг биетийн түвшин нь өмнөх дан валенттай вакцин (анхдагч вариант) -ы нэмэлт тунтай харьцуулахад түүнтэй ижил буюу илүү гэдэг нь батлагдсан зэргээс өвчлөл, хүндрэлээс тодорхой хэмжээгээр урьдчилан сэргийлэх боломжтой гэж үзэж байна. Мөн, BA.4-5-ын эсрэг 2 валент вакцины нэмэлт тун нь анхдагч вариант, дельта вариант, омикрон вариант (BA.1, BA.2, BA.4/BA.5 г.м) -ын эсрэг саармагжуулах эсрэг биетийг үүсгэдэг болох нь клиник бус туршилтаар батлагдсан ба, төрөл бүрийн мутант вариантуудаас илүү өргөн хүрээнд урьдчилан сэргийлэх үр дүнтэй гэж үздэг.

Худалдааны нэр	Булчинд тарих Comirnaty RTU (2 валент : анхдагч вариант/омикрон вариант BA.1 эсвэл анхдагч вариант/омикрон вариант BA.4-5)
Үр нөлөө	SARS-CoV-2-ээс үүдэлтэй халдварт өвчнөөс урьдчилан сэргийлэх
Вакцинжуулалтын давтамж ба хоорондын зай	1 дэх удаа (өмнөх тарилга хийснээс хойш 3 сараас дээш хугацаа өнгөрсний дараа) * Булчинд тарих
Вакцинжуулалтын хамрах хүрээ	1 дэх удаа (1, 2 дахь удаагийн) тарилга хийсэн ①65-с дээш насныхан, ②12-с 65 хүртэлх насны суурь өвчтэй болон хүндрэх эрсдэл өндөртэй гэж эмчийн үзсэн хүмүүс, ③эмнэлгийн байгууллагын ажилтнууд болон настны асрамжийн газар зэргийн ажилтнууд
Тарилгын тоо, тун	Нэг тун 0.3 мл-ээр нийт 1 удаа

- Энэхүү вакциныг өмнө хийлгэсэн вакцины төрлөөс үл хамааран хийлгэх боломжтой ч анхны тунгаар хийлгэх боломжгүй.
- Уг вакцины тунг хийлгэсэн ч халдвараас бүрэн гүйцэд хамгаалахгүй тул үргэлжлүүлэн халдвараас урьдчилан сэргийлэх зохих арга хэмжээ шаардлагатай.

Вакцинжуулалтад хамрагдах боломжгүй хүн

Энэ вакциныг доорхид хамаарах хүмүүст хийх боломжгүй. Вакцин хийлгэхээс өмнөх үзлэгийн үед доорхи нөхцлүүд танд хамаатай гэж бодож байвал эмчид заавал мэдэгдэнэ үү.

- Илт халуурах шинж тэмдэгтэй хүн (*1)
- Хүнд цочмог өвчтэй хүн
- Энэ вакцины аль нэгэн найрлагад хэт их мэдрэг (*2) өвчний түүхтэй хүн
- Дээрхээс гадна вакцин хийлгэхэд биеийн байдал тохиромжгүй хүн

(*1) 37.5°C ба түүнээс дээш халуурч байвал илт халуурах шинж тэмдэгтэй гэж тодорхойлно. Гэвч, 37.5°C -ээс бага байсан ч энгийн үеийн биеийн халуунаас их байвал халуурч байна гэж үзнэ.

(*2) Анафилаксийн шок болон бүх биеийг хамарсан арьс, салстан бүрхэвчээр туурах, амьсгаадах, амьсгал давчдах, зүрхний хэм алдагдах, цусны даралт буурах зэрэг харшлын шинж тэмдэг орно. Өмнө нь вакцин хийлгэхэд эдгээр шинж тэмдэг илэрсэн хүмүүст ижил найрлагатай вакцинаар нэмэлт тун хийх боломжгүй.

Вакцин хийлгэхдээ анхаарах хэрэгтэй хүн

Дараах шинж тэмдэг илэрдэг хүмүүс энэ вакциныг хийлгэхдээ анхаарах хэрэгтэй. Вакцин хийлгэхээс өмнө үзлэг хийх үед доорхи шинж тэмдэг танд хамаатай гэж бодож байвал эмчид заавал мэдэгдэнэ үү.

- Антикоагулянт эмчилгээ хийдэг, тромбоцитопени буюу цус бүлэгнэлтийн эмгэгтэй
- Өмнө нь дархлал хомсдол гэж оношлогдсон, эсвэл төрөл төрөгсөд нь удмын дархлал хомсдолын өвчтэй хүн байгаа бол
- Зүрх, бөөр, элэг, цус, хөгжлийн гажиг зэрэг суурь өвчтэй
- Өмнө нь вакцин хийлгэсний дараа 2 хоногийн дотор харшлын шинж тэмдэг, тухайлбал халуурах, тууралт гарах зэрэг шинж тэмдгүүд илэрч байсан бол
- Тагалт өгдөг, өгч байсан бол
- Тус вакцины найрлагад харшилтай байж болзошгүй бол

Хэрэв та жирэмсэн эсвэл жирэмсэн байж болзошгүй, эсвэл хөхүүл хүүхэдтэй бол вакцин хийлгэхээс өмнө эмчид заавал мэдэгдэнэ үү. Хэдийгээр хариуцсан эх барих эмэгтэйчүүдийн эмчийн зөвшөөрөлгүй байсан ч урьдчилсан үзлэгийн эмч вакцин хийлгэх боломжтой гэж үзсэн тохиолдолд вакцин хийлгэх болно.

Хэрэв та өмнө эмэнд хэт мэдрэг эсвэл харшлын урвал үзүүлж байсан бол урьдчилсан үзлэгийн үеэр энэ талаар эмчид заавал мэдэгдэнэ үү.

(Ар талд үргэлжлэл бий)

Вакцин хийлгэсний дараа анхаарах зүйлс

- Вакцин хийлгэсний дараа доод тал нь 15 минут хүлээнэ үү (өмнө нь харшлын шинж тэмдэг, түүний дотор анафилаксийн шок гэх мэт хүнд хэлбэрийн өвчнөөр өвчилж байсан, эсвэл бие тавгүйрхэж, ухаан алдаж унаж байсан гэх мэт хүн дор хаяж 30 минут хүлээнэ үү). Хэрэв бие тавгүйрхвэл эмчид яаралтай хандах хэрэгтэй. (Энэ нь гэнэтийн хариу урвалд яаралтай арга хэмжээ авах боломжийг олгоно.)
- Тарилга хийх хэсэг цэвэр байх ёстой. Хэдийгээр та вакцин хийлгэсэн өдөр усанд орж болох ч тарилга хийсэн хэсгийг үрж угааж болохгүй.
- Тарилга хийх өдөр хүчтэй дасгал сургуулилалт хийхээс татгалзаарай.

Гаж нөлөө

- Ихэнхи гаж нөлөөнд тарилга хийсэн газар өвдөх, толгой өвдөх, үе мөч, булчин өвдөх, ядрах, даарах, халуурах зэрэг орно. Ховор бөгөөд ноцтой гаж нөлөөнд шок эсвэл анафилаксийн шок орно. Одоогийн вакцин нь шинэ төрлийн вакцин тул хараахан тодорхой болоогүй шинэ шинж тэмдэг илэрч болзошгүй юм. Хэрэв вакцин хийлгэсний дараа ямар нэг шинж тэмдэг илэрсэн тохиолдолд вакцинжуулагч эмч эсвэл хариуцсан эмчтэй холбоо бариарай.
- Маш ховор тохиолдолд вакцин хийлгэсний дараа зүрхний булчингийн үрэвсэл болон зүрхний үнхэлцэг хальсны үрэвсэл үүссэн байх магадлалтай жишээг мэдээлсэн. Вакцин хийлгэсний дараа хэд хоногийн дотор цээжээр өвдөх, зүрх дэлсэх, амьсгал давчдах, хавагнах зэрэг шинж тэмдэг илэрснээс эрүүл мэндийн байгууллагад яаралтай хандаарай.
- Маш ховор тохиолдолд, РНК вакцин хийлгэсний дараа Гийен-Барре хам шинж бүртгэгдэж буй. Хийлгэсний дараа гар хөл сулрах, бадайрах зэрэг шинж тэмдэг илэрснээс эрүүл мэндийн байгууллагад яаралтай хандаарай.

Вакцины эрүүл мэндэд үзүүлэх хор хөнөөлийг бууруулах системийн талаар

Вакцинжуулалт нь эрүүл мэндийн асуудал (өвчин, хөгжлийн бэрхшээл) үүсгэх магадлалтай. Энэ нь нэн ховор боловч эрсдлийг арилгах боломжгүй юм. Тиймээс тусламжийн системийг бий болгосон.

Коронавирусын эсрэг вакцины улмаас эрүүл мэнд хохирсон тохиолдолд дархлаажуулалтын тухай хуулийн дагуу тусламжийг (эмчилгээний зардал, тахир дутуугийн тэтгэвэр гэх мэт) олгогдоно. Өргөдөл өгөх талаар оршин суугаа хотын захиргаанаасаа лавлана уу.

Коронавирусын халдварын тухай

SARS-CoV-2 халдварын үед шинж тэмдгүүд нь халуурах, ханиалгах зэрэг нийтлэг ханиадны шинж тэмдгүүдтэй төстэй байдаг. Ихэнх хүмүүс тус өвчний хөнгөн шинж тэмдгээр тусаж эдгэрдэг боловч хүнд тохиолдолд амьсгал давчдах зэрэг уушгины хатгалгааны шинж тэмдэг илэрч, нөхцөл байдал улам муудаж, улмаар үхэлд хүргэх аюултай.

Коронавирусын вакцины тодорхойлолт (Pfizer компанийн омикрон вариантын эсрэг 2 валент вакцин (BA.1/BA.4-5))

Энэхүү вакцин нь РНК-мессенжер (мРНК)-ийн вакцин бөгөөд SARS-CoV-2 (хуучин вариант (анхдагч вариант) болон омикрон вариант BA.1 эсвэл BA.4-5) холболтын үндсэн уураг (вирус хүний эсэд нэвтрэх шаардлагатай уураг) болох липидийн мембран дотор оруулсан мРНК-ийг агуулдаг. мРНК-ийг хүний эсэд оруулахад мРНК-ийн үндсэн дээр эсүүдэд вирусын холболтын уураг үүсэж, холбох уураг болон эсийн дархлааны хариу урвалын эсрэг биетүүдийг үүсгэдэг бөгөөд энэ нь SARS-CoV-2-ийн халдвараас урьдчилан сэргийлдэг гэж үздэг байна.

Энэхүү эмийн хэрэгсэл нь дараах найрлагатай

Идэвхтэй найрлага	<ul style="list-style-type: none">✧ Тозинамеран (хуучин вариант (анхдагч вариант) -ын бүтэн хэмжээний холбох уургийг кодчилдог мРНК)✧ Рилтозинамеран эсвэл фамтозинамеран (аль аль нь омикрон вариант BA.1 эсвэл BA.4-5-ын бүтэн хэмжээний холбох уургийг кодчилдог мРНК)
Нэмэлт	<ul style="list-style-type: none">✧ ALC-0315: [(4-гидроксипутил) азандил] бис (гексан-6,1-диил) бис (2-гексилдеканат)✧ ALC-0159: 2 - [(полиэтилен гликол) -2000] -N, N-дитетрадецилацетамид✧ DSPC: 1,2-дистеоройл-сп-глицеро-3-фосфохолин✧ Холестерол✧ Трометамол✧ Трометамол давс✧ Сахароз

Коронавирусын эсрэг вакцины үр нөлөө, аюулгүй байдлын талаархи дэлгэрэнгүй мэдээллийг Эрүүл мэнд, хөдөлмөр, нийгмийн хамгааллын яамны вэбсайт дахь Шинэ төрлийн коронавирусын вакцин хуудаснаас үзнэ үү.

Эрүүл мэнд, хөдөлмөр, нийгмийн хамгааллын яам, коронавирусын эсрэг шинэ вакцин

Хайх



Хэрэв та вэбсайтаа үзэх боломжгүй бол хотын захиргаатай холбоо бариарай.